

太常因革禮

太常因革禮卷第九十三

廟議五

孝惠皇后賀氏 太祖

孝明皇后王氏

孝章皇后宋氏

孝惠皇后賀氏

禮閣新編建隆三年四月二十五日太常禮院奏准勅故
會稽郡夫人賀氏可追冊皇后仍令所司擇日備禮冊命
者准禮例差官定謚號太常少卿馮吉撰謚曰孝惠止就
陵所置祠殿奉安神主不行四時薦享之禮不設牙盤祭
器四時惟設常食祭奠

孝明皇后王氏

國朝會要乾德元年十一月孝明皇后崩始詔有司議置
后廟詳定殿室之制及孝惠孝明二后先后之次太常博
士和峴奏議曰按唐睿宗追謚劉氏爲肅明皇后又追謚
竇氏爲昭成皇后同於親仁里立廟名曰儀坤廟四時享
祀皆准太廟禮詳此止有二后同廟之門即無各殿異室
之說况太廟曰室同爲一殿今孝惠孝明並建別廟亦宜
共殿別室恭惟孝明皇后早位內朝母儀天下伏請居上
室孝惠皇后緣是追尊止就陵所置祠今若同祔別廟宜
居次室仍依太廟例以西爲上詔可 禮閣新編乾德元
年十二月二十五日太常卿邊先範奏奉勅定大行皇后

議號者歷觀彤史眇覩皇閔咸推中饋之賢以輔興邦之
運塗山之隆有夏姜嫄之王宗周雖婉孌於椒塗能經綸
於草昧其或烏蟾缺耀舟壑遷移長秋之官屬仍存閔翟
之徽容永閔得不望北郊而洒涕臨南面而不怡將撫黃
屋之情惟獻曲臺之謚恭以代行皇后瑤圖襲慶星婺降
祥生知陰教之文宿植坤儀之道爰自嬪於朱邸瑞我皇
家望雲預識於勃興求劍偏鍾於聖念暨化家爲國類帝
禮宗十四位之嬪嬙皆師禮法五千言之道德刻意薰修
纔踰笄總之妙齡已類耆龜之道鑒思賢諫字昌言過補
衮之臣長樂深宮視膳盡先姑之禮永言福履何止期頤
胡天道之混同繆人倫之報應祿壇告慶俄成柩館之悲

桂魄沉暉無復竹宮之楫九有悽酸於中壺六宮號噎於
內朝方士帳中寂歷之香魂不返甘泉壁上口生之畫像
空存何殫當宁之懷但擬易名之典謹按謚法法度明大
曰章慈和適服曰順請謚曰章順皇后詔可

據國朝會要
尋改謚孝明

國朝會要乾總二年正月七日太常禮院狀謹按唐會
要元和十一年三月順宗皇后王氏崩謚曰莊憲初太常
少卿韋纁進謚議公卿書定欲告天地宗廟太常禮院奏
議曰謹按曾子問賤不誄貴幼不誄長禮也古者皇后之
謚則讀於廟江都集禮引白虎通曰后夫人於何所謚之
謚之於廟又曰婦人本無外事何爲於郊也所以必謚於
廟者謚宜受成於祖宗故皇后謚成於廟今請准禮集百

官連書議狀訖讀於太廟然後上謚於兩儀殿既符故事
允合禮經從之奉勅宜令尚書省集官議定以聞其後改
卜安陵禮儀使奏孝惠皇后孝明皇后謚冊請讀於太廟
然後上謚於兩儀殿既符故事允合禮經勅令尚書省集
官議定聞奏者謹按白虎通后夫人於何所謚之於廟謚
之臣子共定謚白之於君然後加之婦人天夫故但有君
而已又唐會要元和十一年三月順宗皇后王氏崩謚曰
莊憲按本紀是順宗之后憲宗之母其禮官遂引賤不諱
貴幼不諱長之文又云古者皇后之謚則讀之於廟言受
成於祖宗也今詳后夫人者有太后也有皇后也若不尊
卑異制終恐禮意未然今欲請凡母后之謚則定於廟而

讀之受成於祖宗乃合賤不誅貴幼不誅長之意皇后之
謚取天夫之義自君之命可也今請孝明皇后孝惠皇后
謚號百官議定制下後行冊之前只差官告太廟告訖上
於靈座况與周朝宣懿皇后禮例並同於義稍允詔可
國朝會要乾德三年二月太常禮院准少府監牒別廟神
門立戟准周朝宣懿皇后廟例立門戟七十二支今來孝
明孝惠等廟神門立戟未審可否禮官言廟社皆南垣一
屋三門東垣一屋一門每門各二十四戟况今別廟祀事
一准太廟之制至于立戟豈有異同宜准令文所看施行
詔可 國朝會要太平興國元年十二月太常禮院上言
太祖皇帝山陵禮畢神主祔廟孝明孝惠二后合奉一后

配食謹按唐睿宗肅明昭成二后並享於儀坤廟至睿宗廟獨昭成以帝母之重升配太廟肅明止享於儀坤近代周世宗正惠宣懿二后並先崩正惠元無位號宣懿居長秋之位其後禮官集議以宣懿配食今孝明孝惠二后伏望將來以孝明皇后配享忌日行香廢務其孝惠皇后享於別廟詔可

孝章皇后来氏

禮閣新編至道元年四月孝章皇后来氏崩翰林學士承旨禮部侍郎知制誥宋白奏奉勅差定開寶皇后謚號者臣聞后妃之德王化所基詩曰以御家邦禮云以聽內治統六宮而立教叶兩耀以齊明媽內嬪虞光啟重華之選

塗山翼夏遂成文命之功昭示母儀流芳女史輔佐之美
圖牒彰聞恭惟開寶皇后柔順利貞肅雖逮下挺生公族
號金穴以承家作配先朝履玉衣而表異彤庭鉛砌不移
儉約之心織室蠶宮每盡躬親之禮夫何景靈不祐六氣
生灾疾有加而無瘳焉降年而不永奄辭椒掖悲動璇宮
今皇帝追感於天倫愴懷靈則輟紫宸之朝謁御素服而
發哀爰命禮官俾旌懿範下臣奉詔敢揚徽烈謚者行之
迹號者功之表節以一惠謚以尊名將符善行之祥宜舉
易名之典謹按謚法慈愛忘勞曰孝溫克令儀曰章伏請
謚曰孝章皇后勅令尚書省集官議定開寶皇后謚號者
臣等聞宮闈秉陰教於是合德先天謚號益尊名所以流

芳厚載稽乎大典昭彼無私恭以開寶皇后沙麓儲祥玉
龜表履輔佐先帝恭勤內朝六宮仰和順之規千載浹會
昌之運濯龍視誠外戚屏如水之車蹈虎同寅永巷無脫
替之諫主上仁深睦族情厚陟岡椒塗之遐壽未登桂御
之上仙何速聖情追悼皇族悲涼乃詢秩禮之臣爰舉易
名之典經云莫大於孝尤居百行之先詩曰爲章於天曾
配二儀之廣兼是徽稱克揚柔明所謚孝章請遵彝式詔
可國朝會要乾德二年二月二日祔享后廟初有司言孝
章皇后爰在先朝母儀天下宜居上室孝惠皇后止是追
崇宜居其次詔孝章殿室宜處孝惠之下

太常因革禮卷第九十三

太常因革禮卷第九十四

廟議六

淑德皇后尹氏 太宗

懿德皇后符氏

元德皇后李氏

淑德皇后尹氏 懿德皇后符氏

禮閣新編太平興國二年正月十三日勅故越國夫人符氏故夫人天水尹氏並追封冊皇后仍令所司擇日備禮冊命二月八日禮院奏伏准近朝周廣順元年九月中追冊皇后柴氏顯德四年追冊皇后劉氏並不行冊禮建隆元年四月中追冊皇后賀氏亦不行冊禮今來冊禮行不行繫自朝旨詔依建隆三年故事尋差太常少卿張永錫

撰謚號度名及本廟樂章舞名永錫奏追冊后謚號者臣
聞王者悼往推恩緣情制禮旌椒蘭之懿行舉圖史之舊
章所以資英魂於九泉傳美名於千古伏以故越國夫人
符氏瑤源析派璧月騰輝素彰柔順之風尤著肅雍之德
用慈惠而接物服澣濯以修身昔當潛躍之辰克叶和鳴
之兆不登遐壽奄謝明時伏以故夫人尹氏婉淑自持賢
明罕對本三從之善訓備四德之柔儀作嫡建事於皇親
率禮無違於母教著女工於絲枲奉王祭於蘋蘩柏城之
丘壠堪傷蓬島之音容永隔今者皇帝陛下統臨辰極纂
嗣皇圖推至仁而澤被九原敷大化而恩覃萬國念深內
則情切中宮感歲月之屢遷歎松楸而已拱宸襟軫悼睿

澤汪洋爰命有司舉茲盛典謹按謚法云溫柔聖善曰懿
言行不回曰淑富貴好禮曰德伏請上故越國夫人謚號
爲懿德皇后上故夫人尹氏謚號淑德皇后詔可是年三
月二十二日永錫又奏二廟登歌酌獻樂章曲名者伏以
懿德皇后符氏稟秀王室推華女宗闈房鳴玉佩之音藩
邱識彤雲之瑞智推敏洽性稟柔和未陳辭輦之言已軫
藏舟之歎清芬歿而可尚懿德遠而彌彰旣修追謚之文
允協飾終之典笙芋在列蓮豆斯陳登歌式薦於明靈作
樂以揚於盛美的獻請奏順安之曲樂章詞云王門稟慶
帝族推賢柔慈內備和順外宣流芳金石著美簡編登歌
配享不亦宜然伏以淑德皇后尹氏辭旨溫恭禮容閑雅

城里咸師於懿範聞風著於桑榆之資中饋之賢遠軫
逝川之歎一辭聖日久閉泉扃定謚追崇式遵於茂典登
歌薦廟宜舉於彝章酌獻請奏嘉安之曲樂章詞云明明
英媛德備椒房言容婉婉禮法昭彰閨闈作則史冊垂芳
終溫且惠播美無疆詔可 禮閣新編淳化元年四月二
十六日太常禮院奏准勅下宗正少卿趙安易奏懿德皇
后列廟在淑德皇后之上臣不測升降因由今有司乃亂
昭穆是爲逆祀臣等檢詳太平興國二年宗正祠部行遣
公牒稱准勅故越國夫人符氏故夫人尹氏並追冊皇后
勅差太常少卿張永錫謨定謚故越國夫人謚爲懿德皇
后故夫人尹氏謚爲淑德皇后自來相承以得元降勅命

所未見先後因依兼檢詳開寶九年太祖山陵公文稱
孝明孝惠二后祔廟勅文內故事周世宗正惠宣懿二后
並先崩正惠皇后元無位號宣懿皇后則正居長秋之位
至世宗山陵集官論定以宣懿皇后配食今太祖皇帝亦
二后議以孝明皇后曾正位中宮母儀天下故以孝明皇
后配食在孝惠之上今懿德淑德二后俱是追崇即未知
次第明據所云逆祀亂昭穆當司今詳自來禘祫享薦序
昭穆並以孝惠懿德淑德三后列於祖姑之下即未知懿
德淑德二后孰爲昭孰爲穆今趙安易所陳乞裁自朝旨
勅令依舊懿德皇后在淑德皇后之上 禮閣新編至道
三年六月禮官言太宗皇帝神主祔廟淑德皇后尹氏懿

德皇后符氏未知二后以何爲配七月詔令尚書都省集
員外郎諸司四品已上官議都省奏議曰淑德皇后尹氏
生無位號歿始追崇況在初潛已聞薨謝惟懿德皇后符
氏享封大國作配先朝雖不及臨御之期而夙彰賢懿之
德伏請以懿德皇后爲配宗正卿趙安易言今百僚議論
苟且憑瀆尊卑若序以後先當用淑德皇后尹氏配食在
懿德之上詔有司詳討以聞禮官言按太平興國中進冊
定謚皆以懿德皇后居上淳化元年宗正少卿趙安易言
別廟祭享懿德在淑德之上臣未測升降之由乃有司亂
昭穆爲逆祀尋勅令依舊懿德在上臣等又按江都集禮
晉景帝即位夏后夫人應合追尊散騎常侍任茂傳元等

議云夏侯夫人初歸景帝未有王化之兆不及景帝統百
揆而亡后妃之化未著遠近追加尊號無經義可據臣等
切以今之所議正與茂元議同且淑德配合之日潛曜之
符未兆懿德輔佐之日藩邸之位已隆然未嘗正位中宮
母臨天下豈可生無尊極之位歿升配享之宗於人情不
安於典籍無據唐憲宗祔廟後二十五年始以懿安皇后
升配順宗祔廟後十一年始以莊憲皇后配食今請虛位
元叶舊儀詔尚書省及禮官同詳定上議云切以懿德皇
后生無位號歿始追崇況在初潛已聞薨謝懿德皇后享
封大國作配先朝雖不及臨御之期但夙彰賢懿之美若
以二后之內則升祔當歸懿德臣等又詳江都集禮晉景

帝即位任茂傅元議夏后夫人合應追尊若比懿德正其
宜也何哉夏侯初歸景帝未有王基之兆不及景帝統百
揆而亡淑德始歸先帝皇宋未有天下是王基未兆也洎
先帝建節充海而淑德遽已薨謝此不及統百揆而亡也
在懿德則不然先帝初啟盤維尹正京邑固已疏封越國
不得謂王基未兆洎開晉邸有內助之德是及統百揆而
亡也又詳周世宗正惠宣懿配食故事當時兵部尚書張
昭太常博士聶崇義同議以正惠追尊位號請以宣懿爲
配其時周朝以太后在位疑宣懿祔廟之後立忌非便昭
等引晉哀帝何太后在上尊所生母周氏爲太妃封其子
爲琅琊王及太妃薨帝奔喪琅琊第七月而薨則奔喪行

服尚不以太后在上爲壓降即忌日廢務於理無嫌今禮
官引唐順憲二帝廟享虛位之文既有追冊二后虛位未
得爲安伏請奉懿德神主升配太宗室又按張昭等議以
周世宗神主無祔廟必若宣懿同祔即正惠神主請加太
字仍舊別廟合懿德皇后配食先帝淑德爲皇太后祀之
別廟曰禮非天降地出酌於人情都省以懿德皇后雖未
正位中宮亦合配享先帝恭依所請至于太者尊極之稱
加於母后施之宗廟禮即未安淑德皇后不加太字仍舊
別廟祭享十一月三日帝率羣臣自含光殿前導太宗皇
帝神主步出乾元門外神主升輅帝奉辭致奠再拜涕泗
嗚咽命有司奉神主祔廟以懿德皇后符氏配百僚詣西

上閤門進名奉慰

元德皇后李氏 太宗

國朝會要至道三年十二月太常禮院上言准制追尊故賢妃李氏爲皇太后按周禮春官大司樂之職奏夷則歌仲呂以享先妣先妣姜嫄也是帝嚳之妃后稷之母特立廟曰閼宮晉簡文宣后既不配食禁宮於外歲時享祭唐先天元年祔昭成肅明二后於儀坤廟又明皇元獻楊后立廟於太廟之西稽於前史咸有明據伏請下宗正寺於后廟內別建殿堂三間及東西南面神門各一齋坊神厨度地之宜修建詔可 禮閣新編咸平元年正月九日尚書邵官員外郎充私閤校理舒雅奏奉勅撰到皇太后謚

議曰臣聞漏泉之澤所以報豐功易名之典所以旌懿德
若乃坤靈薦祉壺則垂芳追榮崇備物之儀考行舉配天
之法則有昭靈啟漢元憲興唐皆資節惠之文以著肅雍
之美敢徵前烈式播徽猷伏惟皇太后慶發河洲祥開石
印克順體家人之道含章彤邦媛之風自幼推賢不觀於
馬戲及笄執禮唯奉於姆師至于締結之功服勤無斁圖
史之學留意兼該故能孝以安親仁而睦族四德之清芳
既遠九重之丹禁有聞爰膺八月之恩宠在四星之列亦
既昭陽式燕上苑嬉遊持盈無却席之譏守正有進賢之
譽蘋蘩蕙藻力奉於蒸嘗幹濯衣裳躬行於節儉由是宮
闈歎服天澤便蕃啟甲觀之殊祥成邦家之大慶孰謂長

秋未正厚夜遄歸雖增懷昔之悲莫遂設帷之請及龍輅
已往鳳歷維新奄四海以爲君痛昊天之恩極於是恭行
寶冊以正璿宮禕瑜之異數畢陳螭虎之徽章備至然後
因山啟兆從祭以時霸陵復俯於南陵清廟還開於別廟
將欲振鴻猷於不朽傳懿範於無窮有詔下臣俾稽寔行
謹按謚法茂德丕續曰元忠和純淑曰德伏以皇太后作
嫡帝室協慶皇家誕生聖人以主宗祏啟萬世無疆之業
成一人有慶之功可不謂茂德丕續乎內輔瑤圖旁裨陰
教樛木有恩於逮下螽斯無忌於衆多可不謂忠和淳淑
乎以大行而受大名以至公而揚至德庶光耀之不泯與
日月而常新伏請上尊謚曰元德皇太后詔恭依 國朝

會要咸平元年二月判太常禮院李宗納等言伏見后廟
孝章次孝惠之室切以孝章皇后作嫡太祖正位中宮孝
惠皇后生無尊稱歿加盛禮升降之際理固無疑且淑德
升祔而懿德配食者蓋以懿德曾享國封固也况孝章母
儀天下者乎欲望遷孝章居孝惠之上又伏見追尊故賢
妃爲元德皇太后別建廟室切以淑德皇后亦在別廟既
同是帝母而無太子按唐穆宗三皇后除宣懿祔廟配享
餘正獻恭僖二太后並別立廟仍各有太字又開元六年
太常議昭成皇太后請不除太字云入廟稱后義繫於夫
在朝稱太后義繫於子如謚冊入陵神主入廟則當去太
字按神主入廟之說蓋爲祔享太廟以壓降之故不當加

太則聖朝文懿而下諸后是也如別建廟室不可 皇后
則唐朝正獻恭僖二太后是也淑德皇后伏請亦加太字
既加之後豈可忌孝惠孝章之下欲望遷就元德皇太后
新廟居第一室以元德次之仍遷莊懷又次之庶尊卑之
序克協於典章薦享之儀有先於孝治又淑德皇后元德
皇太后並未立忌日竊以帝母之尊廟祔斯設登歌薦享
即同配食之儀廢朝奉慰乃闕忌辰之禮稽諸史冊況有
明據謹按唐王韋蕭三后皆武宗之母時蕭太后在宮而
王韋二太后並有忌日欲望特降淑德皇后元德皇太后
忌日下有司依禮行香廢務緣情酌禮庶叶大中事下都
省集議判省張齊賢等上言曰切以宗廟神靈務於安靜

况孝惠作合之始爰在初潛逮事舅姑躬執婦道耐享之
禮宜從後先伏請仍舊爲定又漢因秦制帝母稱皇太后
祖母稱太皇太后嫡稱皇后歷代之尚矣今檢詳去歲
集議狀請升懿德皇后配享又請以淑德皇后准周正惠
皇后禮制加太字奉勅淑德皇后不加太字者緣去歲詔
下時元德皇太后未行追冊今冊命已畢望依宗納所請
其淑德元德忌日已有詔旨更不重議詔懿德皇后依近
勅不加太字餘如所請

太常因革禮卷第九十四

太常因革禮卷第九十五

廟議七

明德皇后李氏 太宗

明德皇后李氏

禮閣新編景德元年四月三日吏部侍郎判太常寺郭贇奏奉勅差定大行皇太后謚號者臣聞一氣肇分天地立剛柔之位三才既序邦家立內外之朝周十亂而文母推賢漢六宮而明后著美陰教克宣於內助母儀允顯於萬方恭惟皇太后挺生母家作配宸極玉衣覆寐顯符甄后之祥璇宮炳靈迴表星娥之瑞雍肅早彰於慎密賢明動叶於歲規方期內贊雍熙外康億兆忽嬰疾疢歷冬春

進藥餌以無憑禱神祇而弗應皇帝至仁至孝事地事天
情鍾陟屺之哀禮過茹荼之戚永懷罔極欽奉鴻名爰命
有司式遵茂典下臣虔承睿旨用闡徽猷且謚者行之迹
也號者名之美也考之善行定以美名冀揚不朽之芳永
播無窮之譽謹按謚法曰無幽不察曰明中和純備曰德
伏請上尊謚曰明德皇太后詔恭依典禮仍付所司贊又
奏檢會到建隆二年昭憲皇太后謚號勅下日百僚詣西
上閤門進名奉慰今詳酌禮例欲俟謚號勅下日中書門
下文武百僚並赴萬安宮進名奉慰詔恭依 禮閣新編
景德元年五月十四日勅太常禮院狀明德皇太后今年
閏九月二十三日權擯九虞禮畢神主耐廟者檢詳至道

三年八月二十八日勅命太宗神主祔廟之前尚書省集議叔德懿德二皇后將來合以何后配食議者咸以叔德皇后尹氏生無位號歿始追崇況在初潛早已禋謝惟懿德皇后符氏享卦大國作配先朝雖不及臨御之期而風彰賢懿之德若以二后之內則當以懿德皇后符氏祔室配享其時議者又以二皇后俱未嘗居后位母天下若便升祔享則涉嫌疑所以議狀之中兩取朝旨夫勅禮非天降地出酌於人情都省以懿德皇后雖未正位中宮亦合配享先帝恭依所請庶物從宜伏緣明德皇太后位正中宮母儀天下將來神主升祔之時未嘗赴何廟堂乞賜裁酌施行詔令太常禮院崇文院檢討同共詳定聞奏七月

尚書都省奏准勅詳定太常禮院奏明德皇太后升祔事
伏以先王制禮後世爲法遠則稽求於古義近則推本於
人情在理或通歷久無弊一帝一后俱載禮文並祔俱升
亦存史策漢宣帝時則有若許氏王氏二后雖無偕配之
說亦行別祭之事唐睿宗時則有若昭成肅明二后先天
初以昭成配開元末以肅明祔是時儒官名臣步武相接
宗廟重事必有據依推之閨門亦可擬議晉驃騎將軍溫
嶠有三夫人嶠薨詔問學官陳舒舒謂秦漢之後廢一娶
九女之制妻卒更娶無復繼室生既加禮亡不應貶朝旨
以李氏卒於嶠之微時不霑贈典王何二氏並追加章綬
唐太子少傅鄭餘慶將立家廟祖有二夫人禮官韋公肅

定議與陳舒前日之論等又晉唐南昌府君有荀氏薛氏
景帝廟有夏氏羊氏今睿宗有昭成皇后肅明皇后魯公
顏真卿廟有夫人商氏繼夫人柳氏是皆二人並祔顯有
典據伏况鄭餘慶顏真卿等習閱禮書最爲先覺當時學
者仰爲師範苟禮有乖背則家無表儀恭以懿德皇后明
德皇太后咸以令範作配先朝雖先後有殊在尊親則一
况懿德久從升祔不可中移明德雖受崇名亦當配室或
從並列深謂協宜伏請以懿德皇后明德皇后同祔太廟
太宗室以先後次之又緣宗廟大典更令都省集議詔令
尚書省集翰林學士兩省御史臺官尚書省六品已上諸
司四品已上同議定奏聞尚書都省奏伏以清廟升祔之

父國之大興歷代沿革之制義重隨時舉位號則月恒日
升著明懸象循法禮非天降地出酌在人情伏以太宗皇
帝昔在初潛懿德皇后早陳內助佐王基於晉邸成帝業
於堯門主蘋祀而將適龍飛被禕衣而首尊魚貫先帝升
於淑德之上蓋旌懿德之賢伏以明德皇太后垂坤範於
六宮倡母儀於四教綽有後先之序俱升閭掖之尊恭惟
皇帝陛下至誠通於神明因心格於天地事親如在過大
舜之孝思非禮不行稽百王之故實太常禮院所議禮既
從長事皆師古望依所奏爲定詔可 禮閣新編景德元
年五月園陵禮儀使奏皇太后謚冊令中書門下兩省修
制候畢擇日告於太廟次日讀於靈座者謹具檢詳與禮

開元六年正月太常奏昭成皇太后謚號已牒禮部以太
字爲非太常報曰入廟稱后義繫於夫在朝稱太后義繫
於子此並載在史冊垂之不刊今百司文牒及奏狀參詳
典故恐不合除太字如謚冊入廢神主入廟即當去之奏
可者今看詳故事欲望將來明德皇太后遷瘞殯宮九虞
禮畢升祔之日瘞虞主之祭題神主時請除太字詔恭依
典禮 國朝會要咸平二年九月二日太常禮院奏元德
皇后已崇冊命猶處殯宮雖園陵有期而虞祔尚遠蒸嘗
之祭旣典禮以未行薦享之儀慮歲時之有闕今編尋舊
典未見明文參詳欲乞每遇朔望及諸節并四時薦新於
元德皇太后攢所權起幕殿差內臣祭享庶符聖意以展

孝思詔恭依 國朝會要咸平三年四月八日祔塋元德
皇太后於永熙陵有司言元德皇太后神主祔廟准禮當
行祔謁之禮載稽前典有所未安伏以追薦尊稱奉加太
宇崇建別廟以脩蒸嘗况當禘祫之時不預合食之列享
廟之制與諸后不同欲望將來神主還京師即詣本廟還
祔廟室薦獻安神更不行祔謁之禮其日帝服總不視事
前後禁樂一日每歲五享禘祫止於本廟如太廟之儀詔
可二十日升祔新廟有司言導迎神主祔廟減園陵鹵簿
之半詔勿減十三日有司具鹵簿奉迎元德皇太后神主
到京權奉安於高懷德宅百僚班迎進名奉慰二十日神
主入陵廟親王宰相文武百官行升祔之禮畢詣西上閤

門進名奉慰六月太常禮院上言准畫日七月十日薦享太廟同日薦享孝惠孝章淑德莊懷皇后廟同日薦享元德皇太后廟將來太廟讀誓文日合有列廟次第望頒定制詔以元德廟次孝惠等廟 國朝會要大中祥符三年十月判宗正寺趙湘請以元德皇太后祔太宗廟室帝曰此重事也俟令禮官參議之 國朝會要咸平六年七月十二日中書門下上表曰臣聞追孝之心所以教民而化下順美之志所以補闕而輸忠俾人祇之協和故家邦而克正矧惟宗祏之至重必資典禮之得宜伏惟皇帝陛下祇紹丕圖誕敷盛德儀刑曩志保乂黔黎自仰受於元符既交修於茂寔鴻基累盛雖既施以紹膺親廟顯親獨禮

容而未稱今則討論邦典啟迪天衷伏見元德皇太后翊
贊先朝茂揚內則誕生上嗣繼撫中區既毓德於堯門寔
宣功於媯汭規徽音之所洽在綿寓以攸同伏自陛下順
考古今遙追慈訓奉尊名於徽冊修時享於閔宮雖如在
之靈每增於霜露而合享之禮猶闕於蒸嘗未升侑於祖
室止別祀於寢廟雖循典故未至欽崇臣等覃思夙宵精
求沿革稽左氏之微旨述魯堂之昌言母之貴焉必由於
子子之孝也始因於親后稷諸侯故姜嫄吳祭於帝嚳開
元王者故昭成祔享於睿宗舊典可知輿情難奪是以載
稽前史博訪攸司冀口長樂之尊稱用祔德陽之正位臣
等今與禮官共議欲改上元德皇太后徽名曰元德皇后

升祔太宗皇帝廟室所冀誕彰孝治協契人心揚不圖之
烈輝佑無疆之丕緒詔答曰朕紹承天序欽奉宗祊每思
積累之祥敢忘絮豐之享恭惟皇妣早輔先朝開沙麓之
殊祥茂河洲之懿範載惟冲眇寔荷慶靈永懷顧復之恩
唯動淒瀟之感乃者虔稽往冊茂建尊名仍經始於閼宮
用祇肅於明祀卿等職當寅亮志在傾輸爰貢封章備陳
故實願從升祔之典式昭崇奉之儀旣經據之甚明矧忠
誠之斯著俞茲勤請協乃彝章嘉歎之懷鑒復增切所請
恭依尋翰林學士晁迥等文武百官趙安仁等相繼拜章
有請詔答如前 國朝會要是月二十二日中書門下上
言詳定所狀准詔改上元德皇后徽名升祔太宗廟室按

唐先天元年祔昭成肅明皇后於儀坤廟肅明皇后雖睿宗在藩之日已立爲妃緣昭成皇后以帝母之尊故位居其先今元德皇后伏請升祔於懿德皇后之上臣等伏以揚名顯親百代之彝訓沿情教愛萬姓之式瞻伏惟元德皇后兆協曾沙功參鍊石堯門載育早播於徽音禹服纘承誕隆於鴻緒陛下適追先訓茂闡宸猷思結凱風感深濡露肇新徽稱已極於孝思首祔太宮允符於公論願俞勤請庶協舊章伏乞依詳定所請典禮施行詔曰朕以眇質仰承慶基顧復之恩增悲於罔極蒸嘗之典期協於大中祇徇奏封肇諧升侑卿等奉予孝治稽乃禮文采儀坤之舊章著昭成之先食省覽云畢感咽良多載念尊親蓋

惟極至在乎陟降非敢措辭惟以升祔之歲時用爲合享
之次序矧風膺於慈順寔永志於冲謙思抑畏以攸尊庶
明靈之來格宜恭以元德皇后神主祔於明德皇后之次
十月二日宰相王旦自中書省具黃麾仗奉元德皇后謚
冊寶詣於太廟六室禮畢奏冊寶復還於中書省三日王
旦奉冊寶詣元德皇太后廟翰林學士陳彭年讀冊文畢
宮闈令奉神主升輅至太廟左司諫知制誥路振改題神
主升祔百官倍位禮畢詣閤門拜表稱賀詔答之

太常因革禮卷第九十五

太常因革禮卷第九十六

廟議八

章懷皇后潘氏 真宗

章穆皇后郭氏

章懷皇后潘氏

禮閣新編至道三年七月二十四日勅尚書司封郎中直
秘閣兼雍王府記室參軍朱昂奏奉勅故莒國夫人潘氏
追冊皇后差撰謚號者臣聞推美者在乎易名錫號者在
乎考寔此定謚之大旨也其或懿範前著柔風後垂宜擬
芳猷用符歲稱國有舊典我舉而行伏以故莒國夫人道
叶坤靈德隆陰教非善不舉率禮無違居則有蘋蘩之勤

行則有璵璠之節慈以接下順以穆親長秋之位未升大
夜之悲俄至靈駕不返仙籍長歸無方士以推尋動聖皇
之悲咽今則皇帝以纘承大業恢振丕圖澤漏九泉恩覃
八表惻修靈之不享歎中壺之未居寶帳兮徘徊可傷瑤
池兮歸去何速由是奉其茂典飾以崇名追行金劍之榮
表正璇宮之位永言茫昧諒極哀榮謹按謚法履正志和
曰莊慈仁折行曰懷伏請上故莒國夫人謚號爲莊懷皇
后詔可是歲八月四日詔令昂別撰追冊皇后陵以保泰
爲名詔可

章穆皇后郭氏 真宗

禮閣新編景德四年四月十五日大行皇后崩閏五月翰

林學士李宗諤奉勅撰大行皇帝謚號者臣聞關雎者王
化之基坤元者厚德載物是以椒塗方御則正位以聽內
朝惠門既淪則易名而示四海將以流芳亘古垂裕方來
奉前修節惠之文遵歷代不刊之典伏維大行皇后斗維
降慶沙麓儲休令儀柔嘉懿質純茂靈符告於石字吉祥
驗於玉衣而自邦援有歸戚藩作儷逮事先帝寅奉皇姑
恭順發於誠心正淑表於姻戚及銅扉肇啟金璽崇榮執
纂組以彌勤服國史而無數屬向明於大寶爰總治於長
秋德冠六宮母臨萬國樛木逮下聿協聲詩大練爲衣益
敦儉素而又侍養長樂恭順慈顏朝夕勤盼悅之儀行步
有珮環之節允釐壺則式是家邦宜當長御禕褕有事種

種而軒星掩耀桂魄沉輝遽謝昌辰靡延遐算皇上悼音
徽之如昨念日月之有期爰命下臣仰稽前訓庶芳猷之
不泯紀大行以長存列於冊書告於宗廟謹按謚法履正
志和曰莊賢德信修曰穆請謚曰莊穆皇后詔可 禮閣
新編景德四年七月有司奉莊穆皇后郭氏神主自瓊林
院謁太廟耐享於昭憲皇后饗畢耐別廟羣臣詣閣奉慰
先是園陵禮儀使晁迥言乾德中耐孝惠孝明皇后於別
廟同殿異室有司言孝明正位宮壺宜居上室孝惠追冊
禮當次之其廟室請准太廟以西爲上詔從其議今莊懷
皇后雖先廟享本自追崇莊穆皇后正位宮壺母儀天下
其神主耐廟望依禮例遷於上室詔可 禮閣新編乾興

元年七月尚書都省奏大行皇帝山陵禮畢神主耐廟所
配室有莊穆皇后郭氏莊懷皇后潘氏未審以何后遷
耐廟配食令集議莊穆皇后郭氏曾母儀天下欲請依世
宗宣懿皇后太祖孝明皇后例遷耐廟配食者檢會至道
三年大行皇帝耐廟之時配室有淑德皇后尹氏懿德皇
后符氏二后之內未審以何后遷赴太廟耐廟其時準勅
令尚書省六品已上諸司四品以上官集議欲望下尚書
都省依例集官再行定議者臣等聞作配宸居緝熙於內
治類德坤象謚靜於中闡蓋以體應靈符母儀天寓黃氣
滿室則生以凝祥白石刻文則處而表異切以莊穆皇后
爰自青牕振蕙蘭殿珮瑜洎乎上帝是依大人繼照既齊

明於建極乃總順於長秋采輦成章金螭備璽宣陰教之
純茂昭懿範之肅雍大練爲規繼流芳於簡冊卷耳助化
復載美於聲詩蓋作合之有光寔耐饗以爲允其若麗軌
平臺之際薦橐籥石之初雖邦媛之有歸而天極之未矚
或追尊建號式增永感之懷若配室著儀難被遵行之典
今以禮儀院集議莊穆皇后曾母儀天下欲請依世宗宣
懿皇后太祖孝明皇后例遷耐廟食者禮本前經事存往
制酌斯公論克協大猷伏請依禮儀院所奏施行詔恭依
禮閣新編乾興元年八月十六日禮儀院奏將來莊穆皇
后神主遷耐真宗皇帝室配享合行奏告遷莊懷皇后神
主却入莊穆皇后室欲令諸司依例施行取進止詔可

禮院例冊皇祐二年五月禮院奏准中書批送尚書祠部
員外郎天章閣侍講趙師民表詔令禮院與兩省同議聞
奏者師民言夏商以往謚號蓋簡有周之初典文浸興禮
記載武王之事追王太王王季文王者謂太王王季既尊
以稱號至于文王更加以謚法也太姜太任太姒之賢而
尚未有謚則其禮猶畧焉於後幽王之后謂之幽后惠王
之后謂之惠后此皆從王之謚以爲稱以同王之謚以爲
謚也左傳記景王之后謂之穆后則后之有謚始於此焉
東周之際王制所及國俗不一夷蠻遠國易名不及其君
長中夏諸侯考行或達於臣妾在夷則畧在華則詳禮斯
然矣其間諸侯魯禮尤備君之夫人皆自有謚不從於夫

獨定妣以首末非義止曰定妣不稱小君公羊載宋之恭
 姬者乃從其夫之謚爲配耳非謂姬之謚自爲恭也漢室
 之興周典尚近未能考故而習秦餘乃尊太公曰太上皇
 又加昭靈昭哀二后謚謚加於妣而不加於父號及其姉
 而不及其祖以爲失矣前漢諸后皆不加謚止從帝名以
 爲之稱趙太后未王而貶爲孝成皇后此又足以知從帝
 之謚以爲稱非同帝之謚以爲謚也惟衛氏以追尊之故
 乃謚思許氏以早世不遂謚曰恭哀蓋於時憲度未立后
 妃之謚或有或無非有定制漢家之興爲未備矣後漢中
 興世主好禮考姬周之典參前漢之儀既從其帝名復加
 以后謚表帝之名於上繫后之謚於下故光烈皇后者謂

光武之烈皇后也非兼光以爲謚也明德皇后者謂明帝之德皇后也非兼明以爲謚也然自明德皇后而下皆以德謚故蔡邕以爲善惡不寔非行大者受大名行小者受小名之義乃追改和侯曰熹安后曰思順皇后曰烈后之謚之雖改而帝之名不易又足以知從帝之謚以爲稱非同帝之謚以爲謚也魏氏及晉蓋亦因之魏武宣皇后者謂武帝之宣王后也文昭皇后者謂文帝之昭王后也武之爲謚非后所宜又非帝之名止於一而后之名得兼二也晉之武元皇后武悼皇后義亦同此傳稱之止曰元后曰悼后史氏追書又繫以武焉惠皇后以居位不終故不得謚止曰惠皇后蓋從帝之名而非后之謚也東晉稱簡

文帝之名曰簡文順皇后孝武之后曰孝武定皇后以帝
謚有二非后之名兼此三者也其後宋之文元梁之武德
並先易名而後繫帝號義猶此也後魏本自北夷而禮同
中夏悼武以上且從帝名猶前漢之制也明元以降更加
后謚採後漢之法也文明皇后以臨朝之故加謚二字史
氏書曰文成文明皇后者由帝之與后俱以文謚非相從
配故兩稱之帝后同謚乃兩出之者又足以見從帝之謚
以爲稱非同帝之謚以爲謚也唐室因之亦無所變太武
之后其謚曰穆故曰太穆皇后文皇之后其謚曰德故曰
文德皇后睿宗以後或追改舊謚或增加本號故自昭成
肅明二后而下不復配以帝名史氏稱之乃或冠以廟號

廟之冠於后謚又始於此朱梁之世禮官失謬梁祖之謚
其名有五獨取其一一以繫后謚曰元正皇后原其本意謂
以后當同謚也違誤之由良始於此人君后妃善惡自異
受名之義安可同也五代之際時運屢改后妃終位厥數
無幾若後唐之正簡有周之宣懿近於唐制此頗爲得聖
朝之初亦因五代之制及昭憲皇后上謚有司乃議改明
爲昭此於梁世禮官其意同也又孝惠孝明二后所上謚
在太祖之前而並以孝謚及後太祖上謚乃於帝謚之中
取其孝字以追配焉然臣以爲於義雖有違於文尚未失
於義有違者以后同帝之謚以爲謚也於文未失者帝之
謚猶在上后之謚猶在下也洎懿德淑德二后上謚亦皆

在太宗上謚之前而又並以德謚及後太宗上謚復取帝謚之中德字以追配焉臣故謂義之與文斯俱違矣何則德者帝之謚也今更在下淑與懿后之謚也今更在上帝之與后猶天之與地上下之位不可易也今乃以所從帝之名繫於下所配后之謚著於上遠考周漢次及魏晉南北朝諸朝隋唐五代未有此也臣又聞后之謚忠和純淑曰德漢之明德章德是也此則帝名之德與后謚之德異矣臣不知上此謚者意謂帝之德耶謂后之德耶以爲帝之德也則不當繫於后謚之下以爲后之德也則不當以爲從帝之稱臣故以爲違謬始於梁世之有司流禍自彼積疑至今乃者莊懷莊穆二后又俱以莊謚口以帝謚無莊

方復追改而未知違失之源由於□□書曰若稽古言帝者之作必考於古也語曰必也正名乎今以帝謚繫於下后謚著於上謂之曰正臣竊未安夫革弊去惑修復聖制明王之盛舉也因陋就寡拘滯所習愚俗之常守也臣幸得以鄙陋之資值盛明之運故敢發舒所見候聖哲而裁焉臣等伏以孝惠孝明二皇后太祖在位時追謚淑德懿德二皇后太宗在位時追謚當時亦未有所繫其後帝謚既定字法相合有司因仍遂著典冊伏緣帝謚在上后謚在下止出於後漢明帝但東漢一朝遵而用之自魏晉迄唐後謚或一字或二字亦不盡繫於帝謚今詳太祖太宗真宗謚號其間功德神聖文武睿孝明九字相朝相通若

必取一字以冠后謚即孝德二字無專主一室之文必若
遠稽漢制即太祖太宗謚后謚號並須改上况祖宗號謚
本朝自有制度即后謚所繫不應盡取漢明之法且神道
貴靜禮典從宜恐不可輕變輒改詔令禮官兩制同議以
聞禮官兩制奏祖宗后謚本自有制度恐不可輕爲變改
詔恭依

太常因革禮卷第九十六

太常因革禮卷第九十七

廟議九

章獻明肅皇后劉氏

章懿皇后李氏

章獻明肅皇后劉氏

中書例冊明道二年四月二十七日翰林學士馮元奏臣奉勅定大行皇太后謚號四字者臣聞謚者行之迹名者實之賓謚行相符名實無爽傳之不朽在乎至公若乃帝母之尊節惠斯異議之於官府考之於廟廷書之於冊寶讀之於寢廟上之於梓宮藏之於金匱寔古今之攸重非臣子之敢專恭惟大行皇太后毓粹柔嘉含章敏惠奉事

先帝登建中宮率四教以有倫聞羣言而罔倦存躬儉之
志美播葛覃推逮下之恩仁均樛木豈唯表正於閭則抑
亦內助於朝經頗歷歲時九臻安靖及乎膺道揚之終命
申燕翼之遠謀協佐嗣皇述宣至化交修一德並鑒萬機
探政治之本原識憲章之體要亟臨秘殿共對通臣咨訪
賢能講求機務辭氣溫裕智慮宏深有善必從無言不聽
朝飢廢食日是忘勞夙夜憂勤始終齋肅承偃武之昌運
保持盈之令圖然後嚴奉祿將恭升太室於以申追養於
以謝成功皇帝仰紹先猷俯遵慈誨敦孝恭而不墮承志
意以無違克諧存虞舜之心善繼達武王之志其或會朝
嘉序拜慶誕辰國郊四展於鴻儀軒陛再加於徽號未嘗

不躬趨帷幄盛集臣僚祝萬壽以稱觴奏九韶而盡禮愛
親化於民俗榮養光於簡編九域風從順時而述職百方
景慕納貢而來庭逮夫侍疾宮闈徧嘗藥石夜不遑寐晝
不解衣覃思宥於萬方設祈禳於百祀方循陟而竭力遽
陟岵之纏哀乃睠官司特頒詔令致喪之具加於舊儀彰
善之名倍於常數所以極優崇之典導感慕之懷耳謹按
謚法履正志和曰莊聰明睿智曰獻無幽不燭曰明威德
克就曰肅總夫衆美奉於尊名昭示後昆永隆徽稱伏請
上尊謚曰莊獻明肅皇太后

章懿皇后李氏

中書例冊明道二年四月二十七日翰林學士馮元奏奉

勅差定宸妃追尊爲皇太后謚號者臣聞追冊之儀俱存
於在昔易名之典昭示於方來仰濬哲之挺生由厚坤之
載震誕保隆熙之運永懷顧復之恩爰極尊稱式彰恭事
乃崇謚號用播德音伏惟皇太后夙奉先朝久參內職柔
嘉有裕溫順無違孝愛之心諒從天賦勤儉之德本自性
成懿範聿修令聞斯著事上憲循於禮法逮下常敦於惠
和由是帝澤優隆羣情悅服發殊祥於吉夢育嗣聖於昌
辰及乎仙馭登遐龍輶送往侍山園而終喪紀還掖殿而
佐母儀動必肅雍靜惟淑慎屢升班級愈峻歲章宸衷潛
荷於劬勞慈誨每稱其謙退方列四妃之位未正三宮之
名俄遘沉疴忽歸厚夜帷幄盡飾既安殯於郊原陵寢載

營將耐遠於北域皇帝痛睟容之永隔思榮養以無因欲
申周極之情爰舉追崇之禮特頒詔旨以示宰衡仍諭官
司當遵故事於是大陳器備盛列威容重翟禕衣始隆於
異數閔宮總帳期奉於明靈先命近臣俾論節惠苟非實
錄曷著芳猷而况告於廟祧紀於圖牒幸參史館敢盡公
言謹按謚法履正志和曰莊溫柔聖善曰懿皇太后慶承
仙系秩序壹闡持身常守於靜專接衆每彰於輯睦可不
謂履正志和乎誕生真主祇守皇圖克成下武之功允賴
思齊之德可不謂溫柔聖善乎伏請上尊謚曰章懿皇太
后 國朝會要明道二年六月泰寧軍節度使同中書門
下平章判河南府錢惟演上言母以子貴百代之表章廟

以親升前王之盛則恭惟故皇太后輔佐先帝誕育聖躬
德冠掖庭功流宗社皇帝陛下感深濡露薦極尊名既後
寢園將崇廟室謹按唐武宗之母韋太后追尊之後升祔
於穆宗之室國朝元德皇太后追尊之後升祔於太宗皇
帝之室追尊祔廟故事具存又按皇家太廟之內孝明皇
后孝章皇后祔太祖皇帝室懿德皇后明德皇后元德皇
后祔太宗皇帝室今真宗皇帝一室獨祔莊穆皇后欲望
園陵畢日以太行皇太后故皇太后並祔真宗皇帝廟室
二后並配實有舊章如此則宗廟之容合於典禮天子之
孝格於神明伏乞下臣此章付禮官詳議詔禮官議曰宗
廟父昭子穆皆有配坐每室一帝一后禮之正儀自夏商

以來無易茲典至唐明皇帝先天元年始立儀坤廟祭昭
成肅明二皇后開元四年以昭成皇后升祔睿宗之室肅
明皇后依前祭於儀坤及二十一年特遷肅明神主祔於
太廟自是始有並祔之文著於簡策國初太祖皇帝追尊
四廟惟用每室一帝一后之禮太宗皇帝亦以孝明皇后
配享太祖廟室孝惠孝章皇后祀於別廟真宗皇帝登位
之初詔有司將來太宗皇帝祔廟合以何后配食都省定
議請以懿德皇后配食宗正卿趙安易請以淑德皇后祔
廟禮官以明德太后在萬安宮淑德懿德生無尊極之位
歿升配享之崇於人情不安於典籍無據請虛配祔之位
祕閣校理吳淑駁議皆以爲未允時將追尊故賢妃爲元

德皇太后淑因是請以元德升於太廟居同配之位真宗復令都省集官詳定悉如前議詔云禮非天降地出酌於人情都省以懿德雖未正位中宮亦合配享先帝恭依所請淑德皇后依舊別廟祭享咸平三年四月改葬元德皇太后禮院請於后廟別建殿室特撰樂章以奉薦享一如太廟之儀景德元年三月明德皇太后上仙禮院上言援引昭成肅明二皇后並祔之文及歷代典故請以懿德皇后明德皇太后同祔太宗廟室以先後爲次仍下都省集議議同禮院乃詔從之大中祥符三年十月判宗正寺趙湘請以元德皇太后祔太宗廟室真宗曰此重事也俟令禮官議之至六年七月宰臣王旦翰林學士晁迥文武百

官趙安仁等相繼拜章請改上元德皇太后藏名曰元德
皇后升祔太宗廟室然後從之祔於太廟明德皇后之次
聖朝故事其禮昭然今錢惟演云唐武宗之母韋太后追
尊之後升祔於穆宗之室謹按穆宗之室惟以韋太后配
食並無別后惟演又云皇家太廟之內孝明孝章皇后祔
太祖室謹按太祖廟室未嘗以孝章皇后配食惟演又云
懿德明德元德皇后祔太宗室今真宗一室獨祔莊穆皇
后謹按真宗朝既以懿德皇后配享太宗廟室及明德太
后園陵禮畢遂以神主升祔固其宜也惟元德皇太后追
尊之後累有臣僚請行升祔之禮先皇帝慎重其事不即
依從但於后廟別殿薦享凡經一十七年其後宰臣等洎

兩制文武百僚繼上封章始議俞允今參詳莊穆皇后著
位長秋祔於真宗廟室斯爲正禮章獻明肅皇太后母儀
天下若山園禮畢升祔太廟即與明德頗同若以每室一
帝一后之禮言之亦合祀於后廟莊懿皇后以帝母之尊
與元德皇太后事體惟一若更行升祔太廟之儀則殊先
帝慎重之意又前代無同日並祔廟堂之比若依元德皇
太后於后廟別殿薦享則元德皇太后終祔於太廟如此
則章獻明肅皇太后章懿皇太后或祔於真宗廟室或祀
於后廟別殿皆繫朝旨非有司所敢議定詔令尚書都省
集官與太常禮院詳定聞奏議曰懿德之與章穆俱首升
於帝廟祔享雖一事體則殊且懿德未嘗正位中宮先祔

太宗廟室當時議者頗亦依違迨乎明德上仙於禮不得不耐何者明德已嘗作儼宸極又復正位母儀與懿德進不同時在禮無所訛讓耐於其次猶謂謙冲元德以帝母之尊尚且久居后廟近臣旋奏中旨勉俞凡經十有七年始從合食恭惟莊穆皇后位崇中壺與懿德皇后有異既已耐享真宗廟室允協一帝一后之文竊以章獻明肅皇太后久處坤元之尊章懿皇太后夙盛日符之貴功德莫與爲比利澤施於無窮宜上法於太宮特崇建於新廟臣等謹按周禮春官大司樂之職奏夷則歌中呂以享先妣先妣者姜嫄也帝嚳之妃后稷之母特立廟而祭之謂之閼宮又魏明帝追尊明昭皇后別立寢廟有司奏議宜世

世享祀奏樂與祖廟同晉簡文宣太后既不配食築宮於外歲時享祭宋文帝追尊章皇太后立廟於太廟西以孝武昭太后明帝宣太后並同廟梁武帝別立太祖太夫人廟祭用天子之禮臣等謂宜於太廟側別立新廟將來山園禮畢奉安章獻明肅皇太后章懿皇太后神主同殿異室每歲五享朔望上食五禘三祫四時薦新並就本廟一同太廟之儀仍立別廟及各特撰樂曲樂章以崇世享又自來后廟不立忌日蓋爲徽號不稱太后今既存太名即準例忌日廢務前一日不御正殿百官奉慰行香皆同配祔太廟之禮著之甲令以示方來如此則事舉其中理得其正擇其地建廟及廟名樂章望各下有司施行詔恭依

命樞密直學士二部侍郎權知開封府程琳等度地建宮
名曰奉慈

太常因革禮卷第九十七

太常因革禮卷第九十八

廟議十

章惠皇太后楊氏

真宗

李昭述等議附

章惠皇太后楊氏

禮院儀注景祐二年十一月十九日勅翰林院侍讀學士判太常寺李仲容奏奉勅撰保慶皇太后謚號夫以輔佐先朝保佑皇躬撫有萬邦克固鴻業此乃德之大者也答愛育之恩極尊奉之禮修天子之孝致四海之養此又義之大者也若乃壹範長遠國風安仰因心懷慕有惻於上仁考行易名爰稽於舊典伏惟保慶皇太后柔順含章淑明成裕茂赤泉之遐胃藹彤史之芳猷訓恭儉以勵時蹈

謙祇而率履寬而待下動必得中外族無假借之私公室
盡思勤之意自家刑國表裏肅然在昔永定登真寔參付
託之重大明繼照愈敦顧復之慈皇帝俯念續承早從怙
羞無德不報大雅所歎是用奉尊名於長樂揭保慶之天
居親倚之隆皇情斯厚固宜怡神黃老比壽松喬弗慮弗
圖光靈脩閔下臣奉詔式舉義章夫謚者行之迹也義貴
存實據理不誣謹按謚法維德端嚴曰章慈哲遠識曰惠
伏以皇太后淑慎其儀言容有度六宮承式萬乘歸尊得
不謂維德端嚴乎執心博愛之謂慈惟智先幾之謂哲擁
護明聖使天下蒙福得不謂慈哲遠識乎惟前懿之是追
合二名而爲美敢協公議以永徽音伏請上尊謚曰章惠

太后詔恭依 禮院例冊慶歷五年五月詔曰宗廟之禮
重矣朕以涼薄紹口明命獲執圭瓚裸於七室每有事於
親獻既而格於奉慈有懷保育之仁愛若見乎其位惟時
禘祫之享未升昭穆之序禮久不講思無違寧恭惟章獻
太后輔佐先帝母儀道備寔荷顧託參決萬幾憂勤十年
助成治功高明令終盛業隆懋章懿皇后徽柔靜惠迪法
度受帝之祐篤生冲眇永錫景祚啓茲靈長追正東朝之
尊靡及四海之養永言聖善昊天罔極章惠皇太后肅雍
思齊閭掖攸憲率正內職維德之行矧是非躬口口鞠養
撫護之至恩均顧復迺上保慶之冊以崇長樂之號越三
后厭代多歷年所肆饋合食猶隔閼宮有司不時討論使

國有闕典朕甚懼焉其令禮官爰稽故籍依升祔之禮辨
陟配之正中書門下審加詳考以稱朕意於是禮官奏曰
臣等聞宗廟之位所以奉先烈配祔之禮所以嚴時享典
制具在今古共貫謹按唐史肅明皇后本中間之正昭成
皇后緣帝母之尊開元追奉並祔睿宗室國朝懿德明德
元德三后同祔太宗皇帝廟恭惟章獻明肅皇太后母儀
天下輔導國政盛業惇固羣生綏靖章懿皇太后擁順坤
極誕生聖躬慈仁迪宣恩德溥大今臣等集議伏請遷祔
真宗皇帝廟室配食序於章穆皇后郭氏之次恭惟章惠
皇太后純範炳灼淑聲流布雖先朝遺制嘗踐太妃之貴
然未正位中掖明道中始加懿號伏緣章懷皇后在真宗

朝已行追冊今參詳事體一同伏請遷於皇后廟序於章
懷皇后潘氏之次又太者生事之禮不當施於宗廟至如
章獻明肅皇太后以顧託之重著臨御之勞朝廷遙追不
德崇尚徽稱若題之別廟以極欽奉則義無所嫌若屬之
配室以循次序則禮或未順况太廟諸室皇后配食並無
四字尊名伏請改上章獻明肅皇太后曰章獻皇后劉氏
章懿皇太后曰章懿皇后李氏章惠皇太后曰章惠皇后
楊氏如此則協李唐之故事孚本廟之正典成一人孝思
之大副萬邦奉瞻之極如九臣等所議伏乞再行集議以
示奉先慎重之意詔兩制以下詳議聞奏翰林學士王堯
臣等奏曰臣等參詳章獻明肅皇太后章懿皇太后遷祔

真宗廟室序於章穆皇后之次請如禮官所議其改上章
獻明肅皇太后曰章獻皇后章惠皇太后曰章惠皇后遷
於皇后廟序於章懷皇后之次揆於禮意竊所未安伏以
章獻明肅皇太后在先帝時正位中壺授遺輔政垂將一
紀勤勞王室阜康生民故盛烈丕功非一惠可舉况謹告
於廟冊藏於陵無容異時更有輕議矧升祔廟祐本極孝
思之報若裁損尊名恐非嚴奉之義而又博詢典故參質
人情有增崇之文無追減之例其明肅二字伏請如舊章
惠皇太后擁佐聖躬慈均顧復故明道中已膺保慶之冊
義尚係子禮順別祠仍請稱章惠皇太后依舊享於奉慈
廟禮官翰林學士孫抃等又奏曰臣等近奉詔書議三后

升耐事已詳定奏。訖伏聞兩制集議明肅二字頗有異同。伏緣廟謚之作所以節一惠易徽名。從古以來未有四字。至如東漢馬鄧二后預臨國政。多歷年所。止有明德和熹之謚。本朝昭憲皇后誕生二聖。藝祖之武功神宗之文德。卓越焜耀。自經籍而來未有如此之盛。亦不聞有四字謚。况宗廟陟配之禮所以序昭穆明長幼。教天下以恭順。今獨此一謚踰其姑及祖姑。豈朝廷教天下恭順之意乎。若曰已著之謚冊藏諸寢廟。不當裁損。則太字亦當留之。且禮失不改。何以示後世。臣等職任禮局。敢不詳正。惟陛下財幸。詔可。禮院例冊慶歷五年龍圖直學士李昭述奏曰。臣竊見禮官議章獻皇后章懿皇后並耐真宗皇帝廟

序於章穆皇后之次臣謹按開元故事昭成序位在明肅
之上真宗皇帝祥符中禮官上言亦請升祔元德皇后於
明德皇后之上當時詔書諭以元德平昔謙抑之意因而
未許恭以章懿皇后膺天眷命誕育聖躬今升祔有期論
議爲重稽開元祥符之舊例昭成元德之誼恭請序於章
穆皇后章獻皇后之上不勝大願詔優下昭述所奏令兩
制詳議翰林學士王堯臣等議曰臣等參詳先朝始議升
配元德之時有司奏請序在明德之上是時先帝深酌禮
意決於聖衷降詔曰載念專親蓋惟極致在乎陟降非敢
措辭唯以祔廟之歲時用爲合享之次序恭以元德皇后
神主祔於明德皇后之次今陛下祇事宗廟特頒明制以

升祔三后參訪近臣禮官之議請以章獻章懿並祔於真宗廟室叙在章穆之次此則遠承先帝之志近仍別廟之序其李昭述所請蓋循當時有司之請未本先聖詔中之意伏况章穆升祔歲月已深奉慈三室先後素定若再議陟降則情有重輕乞從祥符舊章於禮爲順詔並送中書覆議中書門下議曰臣等伏以清廟之尊配食尤重或稱古者祔止一后而語無輕見之明或謂歷世祭有別園而禮非孝道之極是使繼室之祀泥古而不通以子貴之親掩恩而難議必俟元聖肇經大猷先帝德函天元孝通神理每惟開元舊典創而未備故斷自聖慮揭爲新儀奉升三后並享太宗廟室覺終古之未悟暢罔極之至懷上當

靈心未盡昭報是以神克綏侑邦介繫社皇帝陛下膺襲
熙之運謹適追之猷而獻懿別祠依違一紀慎重大體翹
勤孝思羣情戢而未喻嚴祐虛而有待今乃沛然下詔發
於至誠尚復退託謙勞著加延問質於禮官之議覆以近
臣之詳參考既同秩序惟允臣聞緣人情以制禮則切而
有實奉先訓以作古則顯而易遵故成憲在前文考之意
也配食一體二慈之宜也承奉無改陛下之孝也臣等不
勝大願請如禮官及學士等所議奉章獻明肅皇太后章
懿皇太后升配真宗廟室明肅尊謚如故章惠皇太后仍
享奉慈別廟皆得禮之變順祀無違者矣其李昭述所請
本其推奉極於尊崇按祥符之詔書繫章聖之特旨令議

者雖據前比而臣等猶所未安其位序先後欲乞聖懷制
定其當使昭示萬世永永無窮餘請付外施行詔曰夫國
之大典無若宗廟之制之爲重也比朕以奉慈三室未登
禘祫之位四時之感每懷靡寧故命奉常講求舊章而又
參質乎近臣考詳於宰司庶無謬違以竭誠盡慎卿等與
朕同德稽衆正論奏章在上事體惟允若夫緣人情以制
禮則切而有資奉先訓以作古則顯而易遵載味此言實
契朕意祇覽祥符之詔深原文考之旨極意尊親之際重
形陟降之辭故以祔廟之歲時用爲合享之次序義無差
別情無重輕矧在菲涼欽率成憲今日之義敢或異諸恭
依禮官所議奉章獻皇后章懿皇后序於章穆皇后之次

上致奉先之順下成繼志之美永修明祀冀享靈心口

禮院儀注慶歷五年禮官奏章獻明肅皇后章懿皇后並
已遷耐真宗廟室訖請遷章惠皇太后神主入章懿皇太
后別廟舊室更不毀廢所有章獻章惠舊室請從元德舊
禮並即毀廢詔可 禮院儀注嘉祐四年兩制議章惠皇

后遷耐竊惟古者制禮本於親親而母以子貴婦以夫貴
故天子之母雖不及養必有追諡之文天子之匹雖不及
貴亦有追冊之典舍是二義在禮無傳恭以章惠皇太后
保養聖躬其德隆茂先帝顧命正位太妃而陛下不忘慈
愛之勤德崇保慶之號生榮以養追奉以恩肇祀別宮允
爲隆禮其於孝惠皇后孝章皇后淑德皇后章懷皇后義

則有殊禮難同耐臣等參詳欲乞章惠太后依舊享于奉
慈廟其南郊朝謁亦乞一比皇后廟行禮庶得允當詔可
其將來南郊親詣奉慈廟行禮仍告罷親享今復每遇南
郊止命宰臣行事

太常因革禮卷第九十八

太常因革禮卷第九十九

廟議十一

改上真宗諸后尊諡

追冊皇后郭氏上

仁宗

改上真宗諸后尊諡

禮院例冊慶歷四年二月尚書工部員外郎同判太常寺
呂公綽奏曰臣竊見真宗皇帝諡以文明武定章聖元孝
而五后之諡皆連莊字在昔無簡冊之據當今變祖宗之
例蓋古者婦人無諡皆從夫諡以爲稱故文王之妃曰文
母宋共公之夫人曰共姜聖朝祖宗諸后諡號共遵此制
是以僖祖文獻之后曰文懿順祖惠元之后曰惠明翼祖

簡恭之后曰簡穆宣祖昭武之后曰昭憲太祖之謚有大
孝故太祖之后曰孝明孝惠孝章太宗之謚有聖德故太
宗之后曰懿德明德元德淑德皆真宗在御有司追謚潘
郭二后曰莊懷莊穆及厭代之日莊穆升配有司失於論
請遂使后謚不繫於帝其後奉慈諸后繼循前失謹按乾
德禮例改謚明憲皇后曰昭憲以從宣祖之謚今真宗皇
帝謚有章聖伏請改上五后莊謚爲章有詔下兩制禮官
詳議聞奏翰林學士承旨丁度等以爲公綽所奏引后從
帝謚乃漢故事漢世帝謚止於一字與今典制不同難於
更改詔從公綽所奏仍俟因大禮以奉冊寶是年十一月
皇帝有事南郊朝享太廟前一日遂行此禮初禮官上言

謹按神主初耐廟室有差官題書之儀至于後世遂者改題之禮自三代以來所未嘗有唐大中三年追謚順宗憲宗博士李調請集通儒以議其事有右司郎中楊發等以爲不可而中書門下獨請改題至國朝乾德中改上昭憲皇后尊謚特從大中中書門下所請故事改題神主至大中祥符中增上六室帝謚天聖初增上真宗武口二字謚並獨告廟不復改題臣等參詳祥符天聖之儀寔爲得禮欲請將來加上諸后尊謚更不改題詔有司施行其章穆皇后冊文云維慶歷四年歲次甲申十一月戊午朔二十二日己卯孝子嗣皇帝臣伏以尊母儀者功歸於聖淑配宸極者體同於稱謂稽夫漢有光烈唐有文德所以著大

法示來葉也若乃飾鴻徽揚景燦古今通誼也恭以皇妣
莊穆皇后郭氏河汾甲族姜任令猷總治長秋正位坤振
輔佐聖考述宣陰教謙肅以居體 詰以流譽靡臻曼壽
永詒茂範升耐清廟垂裕彤管夫以宗祊之重有司定論
僉以託母天下體無攸遂式遵先典仰圖懿寔追正禮訟
之失稽合禰宮之號順公議之協濟正徽名而允穆上以
廣思齊之美下以伸遙追之孝謹遵攝太尉推忠協謀同
德守正佐理功臣特進行工部尚書同中書門下平章事
兼樞密使昭文館大學士監修國史兼譯經潤文使上柱
國京兆郡開國公食邑七千五百戶食實封二千四百戶
章得象奉玉冊玉寶改上尊謚曰章穆皇后伏願昭格明

靈具膺典冊祐繁昌之緒易顯懿之稱敷宣景耀撫之罔
極謹言其章獻明肅皇后冊文云臣伏以奉宗祧遵聖緒
者莫重於顯親正坤極母天下者匪專於殊號嘗講求因
革參考遺堊昔

藝祖在御易昭憲之稱惟禮

所以稱情惟名所以配德垂鴻萬葉敢不詳正伏惟莊獻
明肅皇太后倪天稟粹曾沙膺慶輔佐文考正位內朝關
雎之德賢才是進濯龍之戒外戚咸勸顧惟菲質夙荷慈
蔭保佑丕構億寧中夏長樂之謠淑聲無已今容臺定論
援據纖悉謂東漢諸后法同帝謚用章聖稱天之謨冠夫
德號臣工之所盡志典冊之所正名著之方來不可闕也
謹遣攝太尉推忠協謀佐理功臣金紫光祿大夫行尚書

吏部侍郎同中書門下平章事兼樞密使集賢殿大學士
上柱國京兆郡開國公食邑二千八百戶食實封八百戶
杜衍奉玉冊王寶改上尊謚曰章獻明肅皇太后伏惟徽
音無極靈監聿昭奄受丕稱幽贊鴻祉子孫千億垂休無
疆謹言章懿皇太后冊文云臣恭聞母統父尊生民之大
訓后緣帝謚前辟之成法曩在乾德模正彝倫易題昭主
協配宣室國著丕範疇有丕承伏惟莊懿皇太后肖順坤
極馮華月體於赫慶羨寔誕眇躬雖託帝武之歆早違天
下之養向者遵舊制易崇名鏤於玉牒藏於金匱比谷公
議頗謂失傳亟下攸司使得詳處咸曰中以無遂爲美禮
以有從爲隆若引文考之惠冠長樂之號得禮之正厭神

之衷臣推求典常參贖宜稱上不敢不循太祖之列下不
敢不繫真宗之義以章代莊信示來葉謹遣攝太尉推忠
協謀佐理功臣金紫光祿大夫行尚書吏部侍郎同中書
門下平章事兼樞密使集賢殿大學士上柱國京兆郡開
國公食邑二千八百戶食實封八百戶杜衍奉玉冊玉寶
改上尊謚曰章懿皇太后惟厥靈監膺是燕章據柔德以
大受奮內則之幽光垂憲億年與祚無疆謹言章惠皇太
后冊文云臣恭聞先帝時懷穆二后早世上仙宗告大謚
用題神主有爲而作未從定制明肅厥務容臺誅功因仍
前比遂聯懿號弗繫於真宗不可謂順有異於祖法不可
謂宜惕然深念思從詳正伏以莊惠皇太后靜婉柔樞仁

明厚博輔佐聖考知臣下之勞擁衛眇質均母氏之愛向緣閔祐已易大名不當神心未協禮意是以採攸司之執奏稽中古之成憲統尊則有典據舊則易遵間詔公卿弗謀而叶謹遣攝太尉推忠協謀佐理功臣金紫光祿大夫行尚書吏部侍郎同中書門下平章事兼樞密使集賢殿大學士上柱國京兆郡開國公食邑二千八百戶食實封八百戶杜衍奉玉冊玉寶改上尊謚曰章惠皇太后伏惟慈烈如在容物是膺捨暫誤之華謚揭永孚之淑聲子子孫孫式克欽承謹言章懷皇后冊文云臣伏聞周稱文母漢著光烈繫王之號與廟俱傳雖忠實遽變詳簡殊尚至於統尊無遂其誼一也恭以莊懷皇太后挺覩天之稟率

流行之恭作麗儲禁攸華早世遽即洪祚追位長秋時推
內範之懿歟有大名之受真宗升遐天誅垂鴻攸司持循
偶失參考今議者援述祖則執據舊章以謂后無外事法
不專蒞況陽秋之善大乎復古聖哲之訓必也正名禮雖
沒美神弗安享敢以章代莊申告典冊奉承聖考順迪母
儀謹這攝太尉推忠佐理功臣樞密使金紫光祿大夫檢
校太傅行尚書工部侍郎上柱國河內郡開國侯食邑一
千戶食實封二百戶賈昌朝奉玉冊玉寶改上尊諡曰章
懷皇太后伏惟光靈有在鑒設孔昭捨可改之權制安不
遷之永憲賜類昌後以撫無窮謹言

追冊皇后郭氏上

仁宗

禮院例冊景祐二年十二月詔塋故郭氏同后禮排設吉凶
凶薄儀仗比附孝章皇后禮例施行 禮院例冊景祐
三年正月祕書丞余靖言伏覩廢后郭氏詔令候塋日約
用后禮者伏以陛下遺晉軫慮漏泉垂澤至仁孝厚之德
也然而銘旌但書大宋汾陽郭氏之柩諸般文書亦只稱
故郭氏名輕禮重臣竊惑之臣聞左史所書慎於愆禮孔
子垂訓必也正名況乎天子以四海爲家以三綱爲統降
於妃匹則爲臣妾故義無所絕恩猶可追郭氏初若廢爲
庶人今茲不改名號而塋用后禮故亦無嫌但以頃因私
恩曾賜金庭之號比來器服咸異生前使死者有知豈安
茲禮書於典冊禮亦非稱臣竊以郭氏作僂宸嚴早經廟

見出宮之始猶處次妃今若特推天慈追復位號易名而
變申之厚禮則器服不虛情理兩得俾營魂有託天下知
仁不亦善乎奏入不報翌日詔郭氏追復皇后仍罷上元
燈樓觀燈右正言直集賢院王堯臣上言聞吉凶必異時
歡戚不相襲事或參升禮所不由昔知悼子在堂而晉侯
鼓鐘招諫於杜賁仲遂卒于垂而魯君猶繹見非於宣尼
刖在聖宸豈宜過舉臣竊問制旨故郭氏追復皇后位號
取今月十八日出塋又覩京城準舊例上元節放燈許士
庶遊看公私作樂今俯近塋日方惻至仁輶綿在塗歌吹
散作以臣觀之深所未可直以臣庶言之尚或輟相於鄰
春戒歌於里殯而况郭氏再蒙天澤還復舊儀則母天下

之尊不殊儼宸極之稱典降豈可使臣民縱樂曾未止停
欲乞准諸宮寺院有先聖神御處依舊用樂外其京城內
外官私作樂處普皆輟罷庶符典禮允協人情詔輟是月
十八日夜放燈 禮院例冊景祐三年正月十六日禮院
檢詳禮例合用謚冊哀冊神主及祔廟等今據明道二年
十二月追冊皇后張氏奉聖旨廟享謚號並令停罷今來
追冊郭氏欲依前例施行詔可 禮院例冊景祐三年正
月二十三日詔勅中書門下朕纂緒膺圖建中御極念持
盈守成之誠敦自家刑國之風期表正於萬邦務恢隆於
至化故郭氏早由冠族選備椒房允資令人以宣內治而
頃因念鬱偶失謙恭既虧承順之儀當行廢黜之典止遷

別館莫省前非而乃屢上奏封願披羽服懇志彌確敦諭
不回勉從請謚之誠仍建修真之宇速嬰沉疾奄謝昌宸
朕以其入預長秋僅周一紀逮事先帝親奉殷園存歿若
斯軫悼良切特中追冊之命復正中壺之名制禮緣情靡
懷於往咎飾終漏澤且慰於遊魂郭氏已降制命追冊爲
皇后其謚冊祔廟並停咨爾宰司當體予意故茲詔示相
宜知悉

太常因革禮卷第九十九

太常因革禮卷第一百

廟議十二

追冊皇后郭氏下

仁宗

溫成皇后張氏

仁宗

追冊皇后郭氏下

禮院例冊嘉祐三年十月二十三日準勅景靈宮欲乞修蓋郭皇后殿翰林學士判禮院歐陽修奏伏以景靈宮自先朝以來崇奉聖祖陛下又建真宗皇帝章懿太后神御殿于其間天下之人皆知陛下奉先廣孝之意然則此宮乃陛下奉親之所今乃欲以後宮已廢追復之后建殿與先帝並列瀆神違禮莫此之甚伏乞特賜寢罷以全典禮

詔送禮院詳定聞奏禮院奏臣等看詳諸寺觀建立神御殿已非古禮先朝以來立殿宇皆是索奉先帝太后亦廣孝思雖不合禮經猶依倣西漢原廟故事今來議立郭皇后影殿於禮無據難以奉行至四年三月勅下禮院令再檢詳禮典申上禮官稱影殿非古也近年萬壽觀立溫成皇后影殿蓋事出一時未曾經禮官詳議不足訓於後若以郭后舊無大過今牽復號名則義當祔廟以正禮典不勝至願起居舍人知制誥劉敞上言伏聞禮官倡議欲祔郭后於廟臣竊惑之昔春秋之義夫人不薨於寢不赴於同不反哭於廟則不言夫人不稱小君徒以禮不足故名號闕然則名與禮非同物也名號存而禮不足因不敢正

其稱况敢正其儀乎郭后之廢雖云無大罪然亦既廢矣
及其追復也許其號而不許其禮且二十餘年今一旦欲
施以嫡后之儀致之於廟然則郭氏之殂也爲薨於寢乎
赴於同乎反哭於廟乎羣臣百姓亦嘗以服母之義爲之
齋戒乎恐其未安於春秋也春秋夫人於彼三者一不備
則不正其稱而郭后於三者無一焉而欲正其禮恐其未
安於義也春秋禘於太廟用致夫人蓋以謂致者不宜致
也不宜致者以其不薨於寢不祔於姑也且傳曰不有廢
也君何以興廢興之間故必有正與不正之理存焉今欲
扶所廢以爲正亦將抑所興以爲不正古者不二嫡則萬
世之復宗廟豈臣子所當擅輕重哉謹按景祐詔書本不

許郭氏祔廟議已決矣無爲復紛紛以亂大禮議者或謂郭后之這命也詔書薄其過旣復其號不得不異其禮譬猶大臣坐非辜而貶者苟明其非辜則復用之豈得不遂便爲大臣乎夫物有殊類異勢未可以相準者臣之與妻其義雖均然逐臣可以復歸故妻不可復合臣衆而妻一也故春秋公孫嬰齊卒於狸貶君曰吾固許之反爲大夫此逐臣可以復歸也杞伯來逆叔姬之喪以歸夫無迎出妻之喪而爲爾者此故妻不可復合也今追祔郭后得無近於此乎乞令諸儒博議極其論難以求折衷於禮爲允八月禮官張洞奏曰伏覩劉敞劄子言郭后祔廟不當令兩制與禮官同共定奪今月十七日赴學士院集議未決

臣謹參考經傳以歷代故事而言之竊以郭氏正位中宮
母儀天下逮事先后親奉寢園按於禮法無大過惡不可
出發所以名臣感慨抗論於朝中外迄今疑之陛下憫其
偶失譙恭旋亦昭洗乃復位號位號既復則謚冊祔廟安
得並停蓋當時執政大臣護已然之失乖正名之典若以
平昔之議爲得彌可駭惑況引春秋禘於太廟用致夫人
爲列據左氏則哀姜之惡所不忍道考二傳之說復有非
嫡之辭援此以證本朝之事恐非其當若曰不薨於寢不
赴於同不耐於姑則郭氏之歿不得其所責當歸於朝廷
死者何罪而始僊宸極終不廟食耶倘以杞伯來逆叔姬
之喪質之譏其旣棄而復逆則天子之后萬方兆姓之母

也非有極惡何素之乎既追復曰皇后又可絕其祭享乎
議者欲用後漢東晉故事或祭於陵寢或築宮於外稽考
二史皆稱曰母况之於今亦未見其合也惟唐創立別廟
遇禘祫則奉以入享於義爲允伏惟勅旨詔再行詳定劉
欽復奉曰近上言郭后追祔非正乞更詳議今月七日學
士院以張洞奏狀示臣準中書批狀令兩制同議臣以所
論與洞不合更不連書然臣觀洞之言曼辭飾說似苟欲
蔽前之失非忠信之道也前世之君廢斥妃后者皆溺於
私愛或嬖妾上僭或讒訐妄及此羣臣皆引大禮伏節死
爭如陛下於郭后固未嘗有此蓋於時聖慮在宗廟社稷
之際不得不然耳昔光武起於布衣紹復天位郭氏其后

也正位十有六年子彊爲太子子輔爲中山王可謂盛矣然自見年長寵衰數懷怨懟光武由此廢之爲中山王太后其後太子彊亦自貶引爲東海王然當時文武大臣元功俊德布於朝廷不以光武爲情有厚薄亦不以郭氏爲過不當廢者其意識深遠知事不得已也今陛下之慮豈不然乎光武雖疾廢郭氏然顧待其家初不褻滅亦明退人以義不緣於私故也此又詔書所以追復郭后之意矣用平生之愛故尊以虛名顧禮義之正故絕其祔廟是范曄所謂使後世覓隆薄進退之隙者也至公至平可謂折衷今洞之意以追復郭后則出於天子以停止廟諡則出於大臣共一詔書也而論之異同未知洞何從見之若不

幸而此言傳於後且歸過君父虧損聖德此其一也且臣前奏最要切者以爲廢興不而立而人君無二嫡備萬世之後而禮分不明也洞既不以此爲辨若不幸朝廷過聽之是雖自以能訐上起廢爲功而猶且陰偏母后妄竇禮正此其二也故臣以謂非臣子之義忠信之道也伏乞并下臣章令兩制詳議臣誠愚妄竊恥聖朝無光武之臣是以莫能推明上德而反崇飾誹謗營爲非禮也不勝區區取進止詔送學士院定奪竟亦不決

溫成皇后張氏

禮院例冊至和元年六月十四日準中書劄子令禮院詳定溫成皇后于葬所或舊宅立廟四時享祀等事尋行檢

詳故事舊宅立廟即無明文若准唐明皇正順皇后武氏於城中立廟旋亦廢絕又况國朝孝惠皇后是太祖嫡配止就陵所置祠殿奉安神主不行四時薦享之禮不設牙盤祭器四時唯是常食祭奠今欲乞只於葬所立祠殿參酌孝惠故事施行工部侍郎知制誥王洙等奏准勅溫成皇后只於墓所立祠殿參酌孝惠故事施行廟南設一門用二十四戟其殿間室并石埵神牆制度等並乞依皇后廟一室之制詔可 禮院例冊嘉祐七年七月龍圖閣直學士吏部員外郎諫院楊畋奏謹按洪範五行傳曰簡宗廟則水不潤下又曰聽之不聰亦然竊見今年夏秋之交久雨傷稼澶州河決淮浙等路大水爲災伏惟陛下臨御

以來每諮訪柄臣容受直諫非聽之不聰也以孝事親繼
行恭謝祫享之禮非簡於宗廟也然而見此災異臣愚以
爲萬幾之聽必有失於審者七廟之享必有失於順者疊
此差失恬然不怪臣下又無規正之言惟是天意深愛陛
下俾其深思過差復之正順也臣欲乞事宗廟之禮有所
未順者皆舉而行之修而正之則必能上當天心感召和
氣詔下禮院檢詳自來郊廟之禮有未順者悉具以聞尋
檢詳如左夫宗廟父昭子穆皆有配室每室帝后相爲敵
體自非正嫡雖以子貴猶不敢升而配祔按周官大司樂
之職奏夷則歌中呂以享先妣先妣者姜嫄也帝嚳之妃
后援之母既無所配故特立廟而祭之謂之閼宮晉簡文

宣太后既不配食亦築宮於外迨至開元四年以昭成皇后升祔睿宗廟遂爲失禮之首先朝元德皇太后追尊之後累有臣寮請行升祔之禮先皇慎重禮典皆不允從別廟薦享凡經十七年其後宰臣等不深詳典據繼上封奏請從升祔中旨聞可至明道中乃議章獻皇太后章懿皇太后廟享有司參酌儀典請立新廟二后同殿異室每歲五享及禘祫並就本廟特撰樂曲樂章以崇世享是爲奉慈廟著之甲令蓋合經據其後卒用錢惟演之議祔於真宗廟室臣等今參議若以懿德皇后祔於后廟元德章獻章懿三后祔於奉慈廟同殿異室每歲五享四時薦新朔望上食務加嚴奉一同太廟如此則允合一帝一后配食

之禮又追尊故溫成皇后於城南立廟四時晝日祭奠以
待制舍人攝事牲幣裸獻登歌設樂並同太廟之禮蓋當
時有司失於講求都無典據昔商宗遭變飭己思咎祖己
訓己祀無豐於昵況以嬖寵列於扶祀非所以享天心奉
祖宗之意也臣等參詳欲乞改溫成廟爲祠殿歲時只遣
宮功行事薦以常饌以明去事有漸不勝主願奉聖旨溫
成皇后廟依奏餘不行

太常因革禮老蘇先生奉詔所修也先是歐陽文忠公同判太常寺始建編修禮書之議朝廷雖從其請然猶重置句就以命禮官既不專任閱歲久之書不果成嘉祐六年七月己酉乃以先生爲霸州文安縣主簿使食其祿與陳州項城縣令姚聞同編纂判寺官督趣歐陽公以參知政事提舉閔五年當治平二年九月辛酉而奏書成國史謂建隆以來三輯禮書嘉祐尤悉則謂此書也古者經禮三百曲禮三千自後世以禮著書者僅存其大概或闕其彌文經禮粗詳而曲禮盡廢以故往往不可復考嘉祐書獨於損益去取異同之際莫不咸在當此時知制誥張環奏以國朝禮不合古制欲命大臣與禮官釐正紬繹然後垂

之永久先生爭之以爲今亦編集故事使後世無妄之耳
非曰制爲典禮遂使遵而行之也遇事而載之不擇善惡
是記事之體也然則其凡例條目先生之定論蓋若此而
昧者顧謂繁簡失中以擅釀目之抑未之思歟其書以開
寶通禮爲本而以儀注例冊附見之且參以實錄封禪記
鹵簿記大樂記及他書經禮曲禮於是兩備張文定公所
謂其事業不得舉而措之於天下獨新禮百篇今爲太常
施用者是也錢侯太虛爲吾州盡刻蘇氏之書於學宮所
以加惠諸生甚厚且屬璧識其歲月因備列之於末云淳
熙十五年正月郡人李璧書